

Promesanan di Ministro Dowers y Ministro Paul a keda na palabra só....

Tur siman tin 2 mucha ta wordo abusa sexualmente na Aruba

ORANJESTAD (AAN): E defensoran di muchanan sexualmente abusa na Aruba, no sa mas unda pa bay bati bel of bati alarma riba e isla aki pa hala mas atencion di nos Gobernantenan y nos instancianan.

Investigacion di Abuso Sexual di Mucha na Aruba, ta hopi slow y no tin material. Ministro ta haci nada. Castigonan cu ta ser duna i e Burdugonan, ta hopi abao, y Parlamentarionan ta haci nada pa cambia ley.

Den un entrevista cu Sra. Gomes di e Fundacion Lisette Gomes contra Abuso Sexual di Mucha, el a mostra cu hopi hende den Gobierno of den Husticia, no kier mira e otro banda, unda e pover victimanan ta haya e 'castigo' di mas largo despues di actonan di abuso.

Pa colmo e burdugo a wordo atrapa cu man den mansa, y ki prueba mas mester pa condena e persona?

Ata den Corte, ta bin purba balanza e castigo bisando cu e.o. e potret a sali den prensa, cu e.o. e burdugo no tin educacion, etc.

"Esaki tin nada di haber cu educacion," Lisette Gomes a indica na DIARIO. "Sea e ta un problema di alcohol of droga, of problema mental cu bo tin pa bay mishi cu muchanan menor di edad, cu no ta algo normal."

"Nos tin pensa di bay haci un Manifestacion dilanti Corte di Husticia, pa pidi un reunion cu e Huesnan pa despues no wak kico ta e siguiente pasonan cu nos lo tuma."

El a sigui bisa: "Nos ta bayendo tur Departamento necesario, tur instancia necesario pa wak kico nan punto di bista ta pa wak kico e siguiente paso ta. Nos a trek e bel tur caminda, y ta lastima pa bisa cu e problema di Abuso Sexual no ta haya atencion na Aruba."

Gomes a mostra cu nan a yega di reuni cu Parlamento unda a bin tende cu tur cos ta cla pa bin cu cambianan.

A tende Ministro Paul Croes muestra cu ta bay aloca cierto suma pa bin cu cambianan na e.o. Bureau Sostenemi. Pero tur esaki a djis keda na 'palabra'. Ta yega momento cu no por haci mucho mas di loke ta haciendo caba, pero esey no kiermeen cu lo bay stop tampoco.

Momento a yega awor pa acerca comunidad pa asina pueblo lanta y yuda nan pa sigui bringa contra Abuso Sexual na Aruba, y pone



presion riba esnan cu tin e cambio den nan man.

Tur e promesanan di e.o. Ministro Paul Croes a keda na 'promesa'. Tempo a pasa

y keto bay tur cos ta mescos. Ta lamentable pero e tema aki no ta hayando atencion, y ta fuel nos den profundidad pa mira con famianan ta sufri

y muchanan ta keda wordo abusa sexualmente.

Den otro articulo tambe el a menciona encuanto e reunion cu Ministro di Husticia Dowers, kende a bisa cu NO tin scarcedad di personal den Departamento di Jeugd- en Zeden Politie. Pero esnan cu ta entrega keho, ta sigui keha con poco personal, y tambe falta di material tin pa haci trabao.

Segun Lisette Gomes, e Fundacion a reuni cu Especialista Dr. Rafael-Croes tambe, kende ta e especialista den e casonan aki, y ta hopi duele pa bisa cu e ta wak pa siman un promedio di DOS CASO.

Pues cada siman, dos mucha tin di acudi na e Especialista relaciona cu casonan di Abuso Sexual. Esaki por mostra cu e situacion di actonan immoral contra muchanan ta sigui socede!

Recien mes despues di sentencia den Corte, unda a duna castigo di 3½ aña di castigo, Hues mes a bira y dirigi su mes na miembronan di prensa presente, y bisa cu ley mes ta bisa cu ta 2 aña di castigo e burdugo tin di haya. Pero Fiscal a logra pa existi mas cu esey, y Hues tambe a cumpli cu e demanda.

Pero na Hulanda tambe tin problema cu e castigonan abao pa hende cu ta Abusa Sexualmente di Mucha. Pero segun Lisette Gomes, e diferencia ta cu na Tera Frieu, nan tin yudanza pa e criminalnan, cu e tin di haya guia pa tanto tempo, pa e no por ripiti su actonan den futuro.

Fundacion Lisette Gomes contra Abuso Sexual di Mucha, a splica DIARIO cu nan a contact UNICEF pa mira ki presion nan por pone na Aruba.